

Ulloq: 26. juni 2020
Kontor: Nordatlantkontoret
Suliarinnittoq: Anders Futtrup
Suliap normua: 2019-731-0044
Allagaq uppersaat: 1384064

**Kalaallit Nunaanni eqqartuussisarnermik inatsisip inatsisillu allat
assigiinngitsut allanngortinnissaannut inatsisissatut siunnersuut pillugu
tusarniaanermut akissutit (Politiit pillugit aaqqissuusseqqinnermik,
politiinik naammagittaalliuutiginnissinnaanermik aaqqissuussinermik
pilersitsinermik il. il. naammassinninneq)
pillugit O Q A S E Q A A T E Q A R N E R I T
ALLATTORSIMAFFIAT**

1. Tusarniaaneq

Inatsisissatut siunnersuummut missingiut piffissami 11. november 2019-imiit 9. december 2019-imut oqartussa qarfinnut peqatigiiffinnullu il.il. tulluuttunut tusarniaassutigineqarpoq:

Advokatrådet, Danske Advokater, Den Danske Dommerforening, Den Uafhængige Politiklagemyndighed, Dommerfuldmægtigforeningen, Domstolsstyrelsen, Foreningen af Offentlige Anklagere, Fængselsforbundet, Kalaallit Nunaanni Eqqartuussivik, Kalaallit Nunaanni Politiit Peqatigiiffiat, Inuit Pisinnaatitaaffiinut Institutti, Kredsdommerforeningen, Landsforeningen af Forsvarsadvokater, Landsforeningen KRIM, Nunatta Illersuisuunera, Politiforbundet i Danmark, Retspolitisk Forening, Kalaallit Nunaanni Eqqartuussiviit, Rigsadvokaten aammalu Rigspolitiet.

Inatsisissatut siunnersuut taanna piffissami 9. januar 2020-miit 6. februar 2020-mut Kalaallit Nunaanni oqartussaaffeqarfinnut peqatigiiffinnullu il.il. tulliuttunut aammattaaq tusarniaassutigineqarpoq:

Avannaata Kommunia, Kalaallit Nunaanni Illersuisut peqatigiiffiat, Inuit pisinnaatitaaffii pillugit Kalaallit Nunaanni Siunersuisooqatigiit, Nunatsinni Advokatit, Kommune Kujalleq, Kommune Qeqertalik, Kommuneqarfik Sermersooq, Kalaallit Nunaanni Politiit pillugit Naammagittaalliuuteqartarfik aammalu Qeqqata Kommunia.

Justitsministeeriaqarfik tusarniaassummut akissutinik ukuninngaanniit tigusaqarsimavoq:

Advokatrådet, Domstolsstyrelsen, Den Uafhængige Politiklagemyndighed, Fængselsforbundet, Kalaallit Nunaanni Eqqartuussivik, Inuit Pisinnaatitaaffiinut Institutti, Kommuneqarfik Sermersooq, Nunatta Illersuisuunera, Kalaallit Nunaanni Eqqartuussiviit, Rigsadvokaten aammalu Rigspolitiet.

Tusarniaanermut akissutini immikkoortut pingaernerutinneqartut ataani issuaaffigineqarput.

Justitsministeriap tusarniaanermut akissutinut oqaaseqaatai uingasunngorlugit allanneqarput.

2. 2. Tusarniutigineqartumut akissutit

2.1. Nalinginnaasumik

Advokatrådet, Domstolsstyrelsen, Fængselsforbundet, Kalaallit Nunaanni Eqqartuussivik, Nunatta Illersuisuunera, Kalaallit Nunaanni Eqqartuussiviit, Rigspolitiet aammalu **Rigsadvokaten** inatsisissatut missingiummut oqaaseqaateqanngillat.

Inuit Pisinnaatitaaffiinut Instituttip politiit maanna nutarteriffigineqarnialernerat politiillu aammalu unnerluussisussaataasut sulinerisa aqqissuusseqqiffiginierneqarnerat pitsaasutut isigisaat. Matumani politiit IT-mut atortulersuutaannik annertuumik pitsanngorsaasoqarnialernera aammalu pinerluttuliornissamik pitsaaliuineramik suliagarnerup aqqissuusseqqinnikkut patajaallisaavigineqarniarnera instituttip iluaraa. Politiit pillugit naammagittaalliuuteqarnernik suliassaqrarfiup nutarteriffigineqarnissaannik suliniuteqalerneq instituttip aammattaaq pitsaasutut isigaa, taamaalilluni politiinik naammagittaalliuuteqarnerit

arlaannaannulluunniit attuumassuteqanngilluinnartunik suliarineqartalissammata aammalu taamaalillutik politiit sillimmatit Politiit pillugit naammagittaalliuuteqartarfik arlaannaannulluunniit attuumassuteqanngitsup piginnaatitsinerata ataanut aammattaaq ilanngutsinneqassammata. Kalaallit Nunaanni pissutsit naammattumik ilisimaneqarnerulernissaasa qulakkeernissaat siunertaralugu Kalaallit Nunaanni Politiit Naammagittaalliuutigineqarnerannut Siunnersuisoqatigiit pilersinnissaanik siunnersuuteqartoqarnera instituttip taamatuttaaq ajunngitsutut isigaa.

Ilaatigut suliniutit killiffiisa aalajangersimasut pilersaaruserluakkamik periaaseqarfignersigut, ilaatigullu politeeqarfimmi siunnersuisoqatigiit pilersinneratigut aqqissuussinikkut aamma inatsisissatut siunnersuummi § 62 e aamma § 62, takuuk inatsisissatut siunnersuummi § 1, nr. 3, piffinni suleqatigiinnissamik pilersaarutit suliarinerisigut, pinerlutsaaliuineramik suliaqarnermi tamatigoortumik isumaliutigilluakkamik, patajaallisakkamik suliniuteqarnissaq pillugu siunnersuut **Kommuneqarfik Sermersuup** tapersersorpaa. Pinerluttuliornissanik pitsaaliuineramik suliaqarnermi meeqqanik inuusuttunillu aammalu inunnik inuuniarnermikkut ajornartorsiuteqartunik ukkatarinninniarneq, kiisalu tamanna pillugu sinaakkutissat kommunini ataasiakkaartuni namminerni qanoq kissaateqartoqarnera pisariaqartitsisoqarneralu tunngavigalugit sapinngisamik aqqissuunneqartarnissaat Kommuneqarfik Sermersuup assorsuaq kinguneqarluartussatut isigaa.

2.2 Politiit pillugit aqqissuusseqqinneq

Eqqartuussisarnermik inatsisissatut missingiutip §§-iini 492 r-imi aamma 493 m-imi kiisalu missingiummut oqaaseqaatini arlalinni politiit sulinerat pillugu (politiit pillugit inatsit) inatsimmut innersuussisoqartarnera **Inuit Pisinnaatitaaffiinnut Instituttip** maluginiarpaa. Politiit atuuffiat pillugu inatsisip Kalaallit Nunaannut atuutsinneqalersimanera instituttip takusinnaanngilaa. Tamanna tunngavigalugu, politiit sulinerat pillugu inatsisip Kalaallit Nunaanni qanoq inissisimanera pillugu Justitsministeeriaqarfik missingiummut tunngatillugu erseqqissaassuteqassasoq instituttip innersuussutigissavaa.

Politiit atuuffiat pillugu inatsisip Kalaallit Nunaannut atuutilersinnissaannut kunngip peqqussutissaattut missingiut tamanut tusarniaassutigineqarsimasoq Inatsisartunullu saqqummiunneqarnissaa siunertarineqartoq, kiisalu Kalaallit Nunaanni eqqartuussisarnermik inatsisip inatsisillu allat assigiinngitsut allannortinneqarnissaannut siunnersuutip matuma

*atuuttussanngortinneqarnissaa kingusinnerpaamik peqatigalugit
atuuttussanngortinneqassasoq Justitsministeeriaqarfiup maluginiaquaa.*

2.3 Unnerluussisussaataasut pillugit aaqqissuusseqqinneq

Eqqartuussisarnermik inatsimmi § 61 e-mi aalajangersagassatut siunnersuutigineqartup malitsigisaanik, pinerluuteqarsimanermik suliassat ilaat statsadvokatinit suliarineqartarallarsinnaanissaat, matumani eqqartuussivinni suliarineqartarnerat ilanngullugit, **Inuit Pisinnaatitaaffiinut Instituttip** maluginiarpaa. Suliap suunera apeqquataatillugu inuit eqqartuusseqataasut Kalaallit Nunaanni pissutsinik ilisimasaqarnissaat pingaaruteqartoq Instituttip tassunga atatillugu oqaatigiumavaa. Tamanna taamaalilluni statsadvokatit sulisuinut aamma atuutissaaq.

Instituttip tusarniaavigineqarnerminut akissutaa § 61 e-mi aalajangersagassatut siunnersuutigineqartumut oqaaseqaatit erseqqissaavigineqarnissaannik pissutissaqalersitsisoq Justitsministeeriaqarfiup maluginiarpaa, taamaalilluni maannakkut allassimalerpoq suliat ataasiakkaartut pinngitsooratik Kalaallit Nunaanni Politiinit aalajangersimalluinnartumik atassuserneqarnissaat naatsorsuutaasooq aammalu Kalaallit Nunaanni pissutsinut tunngassutilinnik Kalaallit Nunaanni Politiinit pisariaqartitaanik statsadvokati paasissutissinneqartassasoq.

§ 61 e-mi aalajangersagassatut siunnersuutigineqartup killilerujussuarmik atorineqartarnissaa naatsorsuutigineqartoq Justitsministeeriaqarfiup aammattaaq maluginiaquaa.

Unnerluussisussaataasut politiillu sulinerat pillugu aaqqissuusseqqinnerup Danmarkimi politiit unnerluussisussaataasullu suleriaasaanni qanoq ingerlasoqartarnera allanngortitsivigissagaa **Inuit Pisinnaatitaaffiinut Instituttip** aammattaaq maluginiarpaa. Unnerluussisussaataasut statsadvokaturimik ilanngussivigineqarlutik taamaalillutik patajaallisaavigineqarmata, kalaallit eqqartuussisaasaannut piumasqaatit suli attanneqaannarsinnaanerisa misissorneqarnissaanik pissutissaqalersitsivoq. Eqqartuussisarnermik aaqqissuusseqqinneq ima suliarineqarpoq, pinerluttulerinermi suliani akuerisaallutik illersuisuusut amerlasuutigut tassaasartut inatsisilerinermik ilinniarsimasuunngitsut. Tassunga ilaavortaaq eqqartuussisoqarfinni eqqartuussisut aammattaaq tamatigorluinnaq inatsisilerituutut ilinniarsimasuusannimmata.

Europamiut inuit pisinnaatitaaffiisa illersorneqarnissaat pillugit isumaqatigiissutaanni artikili 6-imi allassimasut malillugit naapertuilluartumik eqqartuussisoqarnissaanut piumasaqaatit naapertorlugit sunniuteqarluartumik illersorneqarnissamik qulakkeerinninnissamut tunngatillugu pinerluttulerinernik suliani inatsisilerituutut ilinniarsimannngitsunik illersuisunik atuinerit tunngaviusumik ajornartorsiutaasut Instituttip, Kalaallit Nunaanni Inuit Pisinnaatitaaffii pillugit Siunnersuisoqatigiit aammalu Advokatrådip siusinnerusukkut erseqqissaassutigisimagaat, Instituttip tassunga atatillugu erseqqissarpaa. Institutti malillugu tamanna suli atuuppoq, tassami unnerluussisussaataasut aaqqissuussivigeqqinneqarput/taamatut sulinissamut piukkunnarsarneqarput, naak politiit (inatsisilerinermik ilinniarsimannngitsut) eqqartuussisoqarfinni aallaavittut suli unnerluussisussaataasutut atorneqassasut missingiummi aammattaaq erseqqissaatigineqaraluartoq. Piffissami pisut akornanni illersuisutut akuerineqartussanut ilinniartitsinermik siunnersuinermillu suliaqartussamik Nunatta Illersuisuuneranik toqqaasoqarsimanera, instituttip maluginiarppaa.

Tamanna tunngavigalugu unnerluussisussaataasut politiillu sulinerat pillugit aaqqissuusseqqinneq illersuisutut sulinerup aaqqissuuteqqinneqarnissaanik pissutissaqalersitsissanersoq, Kalaallit Nunaanni Eqqartuussiveqarfik pillugu Siunnersuisoqatigiit peqqissaartumik oqaloqatigiissutigissagaat instituttip innersuussutigaa, matumani eqqarsaatigineqartariaqarluni pinerluttulerinermik suliani illersuineq pitsaanerpaaq qulakkeerniarlugu nunatta illersuisuuneqarfia illersuisunik naammattumik patajaallisaanersoq ilanngullugu.

Unnerluutigineqartup naapertuilluartumik eqqartuunneqarnissaa anguniarlugu pitsaasumik illersorneqarnissaanik piumasaqaatip pingaaruteqassusaa Justitsministeeriaqarfiup isumaqatigaa. Taamaattumik ilaatigut tamanna pissutigalugu illersuisutut akuerineqartussanut ilinniartitsinermik siunnersuinermillu suliaqartussamik Justitsministeeriaqarfik Nunatta Illersuisuuneranik toqqaavoq.

Pinerluttulerinernik suliani sunniuteqarluartumik illersorneqarnissap eqqarsaatigineqartarnissaa aammalu tassunga atatillugu Kalaallit Nunaanni illersuisutut akuerisat tunngaviusumik ilinniartinneqarnerisa kingornatigullu ilinniarteqqinneqartarnerisa suliarisarnissaat Nunatta Illersuisuunerata taamaalilluni suliassarilerpaa, matumani pikkorissartitsinissat suliassartaannik aammalu ingerlannissaannik suliaqarnerit kiisalu allaffissornertaannik suliarinninneq ilanngullugit. Nunatta Illersuisuunerata Kalaallit Nunaanni eqqartuussisoqarfiit tikeraartarnerisigut illersuisunik siunnersuineq nakkutiginninnerlu aammattaaq isumagisarissavai aammalu

eqqartuussiviit illersuisullu peqatigiiffiata akornanni attaveqartitsisutut atuutissalluni. Taamaalilluni Kalaallit Nunaanni pinerluttulerinermi sulianik sunniuteqarluartumik illersuisoqarnissap qulakkeerneqarnissaanut aalajangiisuusumik Nunatta Illersuisuunera inissisimaffeqarpoq.

Inatsisinik atuutsitsinermut immikkut aningaasaliissutinit nunanullu avannarlernut immikkut aningaasaliissutinit, taama malittariillutik, 2019-imiit 2022-mut ukiunut 3,5 mio. kr.-it aammalu 2018-imiit 2021-mut 7,5 mio. kr.-it nunatta illersuisuuneqarfiata patajaallisarneqarnissaanut immikkoortinneqarput. Kalaallit Nunaanni pinerluttulerinermi suliani illersuisunik akuerisaasunik naammattunik peqarnissap qulakkeerneqarnissaa siunertaralugu illersuisunik akuerisaasunik ilinniartitsinermi amigaatigineqartut pitsanngorsaavigineqarnissaat aningaasat immikkoortinneqartut peqataaffigissavaat.

Nunap illersuisuuneranik aaqqissuussineq aammalu illersuisutut ilinniartitaaneq ingerlaavartumik Justitsministeeriaqarfiup eqqumaffigaa, matumani nutaanik suliniuteqarnissamik pisariaqartitsisoqarnersoq ilanngullugu. 2020-mi Kalaallit Nunaanni Eqqartuussiveqarfik pillugu Siunnersuisoqatigiit ataatsimiinnerani nunap illersuisuuneranik aaqqissuussineq nalilersorneqassasoq tassunga atatillugu oqaatigineqassaaq.

Nunatta illersuisuuneratut aaqqissuussineq Kalaallit Nunaanni Eqqartuussiveqarfik pillugu Siunnersuisoqatigiit 2020-mi ataatsimiinnerani nalilersuiffigineqassasoq tassunga atatillugu maluginiarneqassaaq. Siunnersuisoqatigiit Kalaallit Nunaanni illersuisoqartitsineq pillugu apeqqut sammiviliiffik pingaarneq tunngavigalugu iserfigissagaat tassunga atatillugu naatsorsuutigineqarpoq.

2.4 Politiit naammagittaalliuutigineqarsinnaaneratt pillugu aaqqissuussineq nutaaq

Politiinik naammagittaalliuutiginnissinnaanermik oqartussaasunut naammagittaalliuuteqarnermi naammagittaalliuut qallunaatut kalaallisulluunniit allassimasoq tunniunneqassanersoq takuneqarsinnaanngitsoq **Inuit Pisinnaatitaaffiinuut Instituttip** maluginiarpaat, soorlumi aamma naammagittaalliuortup imaluunniit naammagittaalliuutigineqartup tamanna pisariaqartissimappagu, Politiinik naammagittaalliuutiginnissinnaanermik oqartussaasut aalajangigai suliamullu allagaatit allat qallunaatuujuppata kalaallisuujujuppataluunniit nutserneqarsimassanersut allassimangitsoq.

Inatsisissatut missingiummi kapitel 42 a-mi naammagittaalliuuteqarnerni sulianik suliarinninnissat ersarikannersumik aalajangersaavigineqarsimanerat eqqarsaatigalugu, tamanna pillugu malinneqartussanik ersarissunik aammattaaq aalajangersaasoqarnissaa institutti malillugu pissusissamisuusaaq.

Tamanna tunngavigalugu missingiutip kapitaliani 42 a-mi qallunaat kalaallilu oqaasiinik qanoq atuisoqarnissaa pillugu suleriaatsit Justitsministeeriaqarfimmit ersarissarneqarnissaat instituttip innersuussutigaa, matumani naammagittaalliortup imaluunniit naammagittaalliuutigineqartup tamanna kissaatigippagu, Politiinik naammagittaalliuutiginnissinnaanermik oqartussaasunit aalajangikkat aammalu suliamut allagaatit qallunaatuumiit kalaallisuumut nutsertassagat ilanngullugit.

Inatsimmut oqaaseqaatit erseqqissaavigineqarnissaat instituttip tusarniaanermut akissutaata pissutissaqalersikkaa Justitsministeeriaqarfiup maluginiarpa, tassa Kalaallit Nunaanni politiit pillugit naammagittaalliuutinik Politiinik naammagittaalliuutiginnissinnaanermik oqartussat suliaqarnerminni, taama tulleriissillugit, qallunaatut kalaallisullu oqaatsinik atuinermi tunngatillugu, suleriaatsit massakut Kalaallit Nunaanni politiit pillugit naammagittaalliuuteqartarfimmi atorneqartut assingi atussavaat. Taamaammat tamanna pisariaqartillugu, allagaatit qallunaatuumiit kalaallisuumut, aamma paarlattuanik, nutserneqartassapput kiisalu killisiuinerminni nutserisoq peqataatinneqartassalluni il.il. Tamanna aamma Politiinik naammagittaalliuutiginnissinnaanermik oqartussat allatigut sulianik suliarinninnerani suleriaasiuvoq.

Inatsisissatut missingiummi § 493 h, imm. 5 aamma qallunaat eqqartuussisarnermut inatsisaanni § 741 c, imm. 3, 2 pkt. assigiinngissuteqartut **Politiit pillugit Naammagittaalliuuteqartarfik Arlaannaannulluunniit Attuumassuteqanngitsup** maluginiarpa, tassani pinerlineqartumut imalluunniit allanut allagaatit imarisaanik ilisimatitsinissamik politiit akuersissuteqarnissaat taamaallaat allagaatinut § 741 c, imm. 2, 2. pkt.-imi pineqartunut pisariaqartinneqartoq takuneqarsinnaammat.

Inatsisissatut missingiummi aalajangersakkamik qallunaat eqqartuussisarnermut inatsisaata § 741 c, imm. 5-ip assinganik ilanngussisoqarsimanngitsaq, Politiit pillugit naammagittaalliuuteqartarfiup aammattaaq maluginiarpa.

Aalajangersagaq ima allanngortinneqartoq, taamaalilluni toqqaannartumik massakut takuneqarsinnaalerluni illersuisoq pinerlineqartumut allaluunniit

suliat imaanik pinerlineqartumut tunngassuteqanngitsunik Politiit pillugit naammagittaalliuuteqartarfik akuersisimatinnagu ilisimatitsissanngitsoq, Justitsministeeriaqarfiup maluginiarpa. Pinerlineqartumut tunngatillugu suliami allagaatit tassaapput pinerlineqartup Politiit pillugit naammagittaalliuuteqartarfimmut nassuiaaneri suliamilu pinerlineqartumut tunngassutilinnik allagaatinik allanik imallit, ass. nakorsap oqaaseqaatai il.il.

Qallunaat eqqartuussisarnermik inatsisaanni § 741 c, imm. 5-mut tunngatillugu, inatsisissatut missingiutip § 493 h-a allanngortinneqarpoq, taamaasilluni maannakkut qallunaat eqqartuussisarnermik inatsisaata § 741 c, imm. 5-iata assinganik aalajangersakkamik imaqalermat maluginiarneqassaaq. Taamatut aalajangersagaqalerneratigut illersuisoq pinerlineqartumit illersuisussatut sulisussarsiarineqartoq, imaluunniit pinerlineqartoq toqkkut qimagussimappat, pinerlineqartup qanigisaanit sulisussarsiarineqartoq, illersuisussanngortinneqartup pisinnaatitaaffisa assinginik pisinnaatinneqassaaq, aamma naak suliaq § 493 h, imm. 1-imut ilanngunneqarsimanngikkaluarpat.

Inatsisissatut missingiummi § 493 h, imm. 4 ima allanngortinneqarpoq, taamaalilluni eqqartuussisarnermik inatsimmi § 157, imm. 2-mut akerliusumik uppernarsaatinik saqqummiisoqartillugu, maanna illersuisoq akerliliissuteqarsinnaalersoq aamma allassimalermat, aammalu eqqartuussinerit pinerlineqartumik killisiuiffiusussat illersuisumik isumaqatigiissuteqarnikkut sapinngisamik aalajangerneqartassat, Justitsministeerip ilanngullugu maluginiarpa. Tamanna ilutigalugu illersuisup eqqartuussinerinik allanik ilisimatinneqartarnissaa erseqqissarneqarpoq. Matumuuna § 493 h, imm. 4-mi aalajangersagaq qallunaat eqqartuussisarnermik inatsisaannut § 741 c, imm. 1-mut assigiissinneqarpoq, taanna inatsisip § 1020 h, imm. 4-mi atorineqartarpoq, tassani pinerlineqartoq pillugu kapitali 66 a-mi aalajangersakkat aammattaq atorineqassat takuneqarsinnaalluni. Allanngortitsinissaq pisariaqarpoq, tassami qallunaat eqqartuussisarnermik inatsisaanni § 741 c, imm. 1-ip assinganik kalaallit nunaanni eqqartuussisarnermik inatsimmi pinerlineqartoq pillugu kapitali 33 imaqanngimmat.

Pisuni piviusuni imm. 6-imi ilaatinneqartuni § 493 h, imm. 3-p aamma 4-p qanoq ilillutik avaqqunneqarneri inatsisissatut siunnersuutip oqaaseqaatitaani takuneqarsinnaanissaa **Politiit pillugit Naammagittaalliuuteqartarfiup Arlaannaannulluunniit Attuumassuteqanngitsup** aammattaq siunnersuutigaa.

Naalagaaffiit allat, naalagaaffiup isumannaatsuunissaa imaluunniit suliap paasineqarnissaa imaluunniit inummit allamit pingajuusumit mianerisassat tunngavigalugit qaqutiguuissumik pisariaqartinneqassappat, siunnersuutip § 493 h, imm. 6-ianut inatsimmut oqaaseqaatini takuneqarsinnaasoq § 493 h, imm. 1 malillugu, tassani eqqartuussisarnermik inatsimmi § 340, imm. 4, malillugu, illersuisup paasissutissanik pisinnaasaasaannik politiit killiliisinnaanerat, illersuisussanngortitaasumut naleqqiullugu periarfissat taamaaqataanik Politiit pillugit naammagittaalliuuteqartarfiup tunineqarnissaata siunertarinqarnera pillugu aalajangersagaq ikkunneqartoq, Justitsministeeriaqarfiup maluginiarpa.

Soorlu aamma Eqqartuussisarnermik inatsimmi 340, imm. 4 malillugu politiinut taamaattoq, Politiit pillugit naammagittaalliuuteqartarfik tassaavoq nammineerluni § 493 h, imm. 6-imi aalajangersakkap atorneqarnissaanik aalajangiisusaaq. Pinerlineqartup Politiit pillugit naammagittaalliuuteqartarfiup aalajangigaa inatsisinik tunngaveqarnersoq apeqquuserpagu, eqqartuussisarnermik inatsisip § 341-rua malillugu apeqquut eqqartuussivimmut tunniussinnaavaa.

Tamakku saniatigut **Politiit pillugit Naammagittaalliuuteqartarfik Arlaannaannulluunniit Attuumassuteqanngitsup** oqaatsinut aaqquissuinernullu tunngatillugu tulliuttunik oqaaseqaateqarpoq allanngortitassanillu siunnersuuteqarluni:

Qupp. 61, immikkoortoq 4.3.1.1.13: ”Taamaattumik Kalaallit Nunaanni Politiit Naammagittaalliuutigineqarnerannut Siunnersuisoqatigiit pilersinneqarnissaat siunnersuutigineqarpoq, Politiit pillugit naammagittaalliuuteqartarfiup qinnuteqarnera tunngavigalugu suliap suliarineqarneranut atorneqartussanik ilitsersuutaasumik Kalaallit Nunaanni pissutsinik immikkut ittunik oqaaseqartarsinnaasumik” imatut allanngortinneqassasoq siunnersuutigineqarpoq: ”Taamaattumik politiit naammagittaalliuutigineqarnerannut oqartussat sulianik suliarinninnerani Kalaallit Nunaanni pissutsinik naammattumik ilisimasaqarnissaq qulakkeerniarlugu, suliani kapitali 42 a-mi aamma 42 b-mi ilaasuni sulianut paasissutissiinernut ilitsersuutaasumik oqaaseqartarsinnaasumik Kalaallit Nunaanni Politiit Naammagittaalliuutigineqarnerannut Siunnersuisoqatigiit pilersinneqarnissaat siunnersuutigineqarpoq”.

Qupp. 61, immikkoortoq 4.3.1.1.4: ”Pinerluttulerinermi eqqartuussisaatsip avataaniittunut iliuuserisimasanut naammagittaalliuutit tamarmik immikkut ittumik naammagittaalliorfusinnaasumut ilaatinneqassanngillat” imatut

allanngortinnissaa siunnersuutigineqarpoq: ”Aallaaviatigut iliuserisimasanut naammagittaalliuitit pinerluttulerinermi eqqartuussisaatsip avataaniitut immikkut naammagittaalliuteqartarnermut aaqqissuussinermi ilaatinneqassanngillat”.

Qupp. 64, immikkoortoq 4.3.1.2.1: ”Naammagittaalliuteqartup aalajangiusimappagu...” imatut allanngortinneqassasoq siunnersuutigineqarpoq: ”Unnerluutiginnittup aalajangiusimappagu...”

Qupp. 75, immikkoortoq 4.3.1.6: ”Siunnersuutip kingunerissavaa, politimesteri...” imatut allanngortinneqassasoq siunnersuutigineqarpoq: ”Siunnersuutip kingunerissavaa, politidirektøri...”

Qupp. 112, § 64: ”... taaguuserneqarpoq Kalaallit Nunaanni Politiit Naammagittaalliutiginerannut Siunnersuisoqatigiit, Kalaallit Nunaanni pissutsit immikkut ittut pillugit suliamut paasinarsaataasunik Politiit pillugit naammagittaalliuteqartarfimmut ilitsersuutaasumik oqaaseqartarsinnaasumik” imatut allanngortinneqassasoq siunnersuutigineqarpoq: ”Kalaallit Nunaanni pissutsinik naammattumik ilisimasaqarnissaq qulakkeerniarlugu, suliani kapitali 42 a-mi aamma 42 b-mi ilaasuni sulianut paasissutissiinernut ilitsersuutaasumik oqaaseqartarsinnaasumik Kalaallit Nunaanni Politiit Naammagittaalliutiginerannut Siunnersuisoqatigiinnik taaneqartup pilersinneqarnissaat siunnersuutigineqarpoq, Politiit pillugit naammagittaalliuteqartarfiup sulianik suliarinninnerani Kalaallit Nunaanni pissutsinik naammattumik ilisimasaqarnissaq qulakkeerniarlugu, suliani kapitali 42 a-mi aamma 42 b-mi ilaasuni sulianut paasissutissiinernut ilitsersuutaasumik oqaaseqartarsinnaasumik”.

Qupp. 127, § 492 m: Politiit Naammagittaalliutiginerannut Siunnersuisoqatigiit suleriaasaat pillugu nalunaarummi nr. 262, 22. marts 2012-imeersumi § 10, imm. 2-mi aalajangersakkammi allassimavoq, aalajangiineq siunnersuisoqatigiinni oqallisigineqareerluni aalajangiussaasimanersoq pillugu aalajangiinermi ilisimatitsissutigineqassasoq maluginiarneqassaaq.

Qupp. 135, § 493 a, imm. 2: ”Politiit tjestemandiusup pinerluttuliorsimanera tutsuiginartumik ilimagineqarpat” siunnersuutigineqarpoq peerneqassasoq, tassami eqqartuussisarnermik inatsimmimi § 493 a, imm. 2-mi taamatut aalajangiisoqarnissaanik tunngavimmik allassimasoqanngimmat.

Qupp. 135, § 493 a, imm. 4: ”Politiit pillugit naammagittaalliuteqartarfik

suliamik suliarinninnermini Kalaallit Nunaanni pissutsinik naammattumik ilisimasaqarnissaata qulakkeernissaa siunertaralugu, Politiit pillugit naammagittaalliuuteqartarfiup imm. 4 malillugu Kalaallit Nunaanni Politiit Naammagittaalliuutigineqarnerannut siunnersuisoqatigiit ilitsersuutaasumik oqaaseqaammik pissarsissapput” imatut allanngortinneqassasoq siunnersuutigineqarpoq: ”Suliani kapitali 42 a-mi aamma 42 b-mi ilaasuni sulianut paasissutissiinernut ilitsersuutaasussamik Politiit pillugit naammagittaalliuuteqartarfiup suliamik suliarinninnermini Kalaallit Nunaanni pissutsinik naammattumik ilisimasaqarnissaasa qulakkeernissaa siunertaralugu, Politiit pillugit naammagittaalliuuteqartarfiup imm. 4 malillugu Kalaallit Nunaanni Politiit Naammagittaalliuutigineqarnerannut siunnersuisoqatigiinnut ilitsersuutaasumik oqaaseqaammik pissarsissaaq”.

Politiit pillugit naammagittaalliuuteqartarfiup oqaaseqaatai inatsisissatullu siunnersuummut allannguutissatut siunnersuutai, Justitsministeeriaqarfiup inatsisissatut siunnersuummut ilannguppai.

2.5 Immikkut paarineqartussatut eqqartuunneqartut sungiussiartuaartinneqarneqarnissaannut nuussineq

Immikkut paarineqartussatut eqqartuunneqartut immikkoortumi ammasumi inissinneqarnissaat naleqqutinngippat, imaluunniit inissiineq taanna naammattumik isumannaassuseqanngitsoq takuneqarsinnaappat, justitsministerip imaluunniit ministerip taamaaliornissaanik piginnaatitaata, inuit sungiussiartuaartinneqarnissaminnut atatillugu Kalaallit Nunaanni inissiisarfinni inissiisarfimmi ammasumi inissinneqarsimasut, Nuummi immikkoortortami immikkut paarisassanngortitsiffiusumi inissinneqarnissaat pillugu missingiut aqutugalugu inatsisigut tunngavissamik pilersitsisoqartoq **Inuit pisinnaatitaaffiit instituttip** paasivaa.

Immikkut paarisassanngortitsiffiusumut nuussineq pillugu Kalaallit Nunaanni Pinerluttunik isumaginnittoqarfimmi aqutsisut inissiinissamik aalajangiisussaasut tassunga atatillugu instituttip maluginiarpa, tamannalu pinerluttulerinermi inatsimmi § 194-imut aallaaviatigut naapertuuppoq aamma immikkut paarineqartussanngorlugit eqqartuunneqartartut inissinneqartarnerat pillugu pinerluttulerinermi inatsisip allanngortinneqarnerani aalajangersakkanut tamanna aammattaq naapertuuppoq (Inatsit nr. 1718, 27. december 2018-imeersoq). Immikkut paarineqartussanngorlugit eqqartuunneqartartut inissinneqartarnerat pillugu inatsisip allanngortinneqarnerani Kalaallit Nunaanni Pinerluttunik isumaginnittoqarfimmi aqutsisut inissinneqarsimasup immikkoortortamit ammasumit immikkoortortami immikkut

paarisassanngortitsiffiusumut utertinneqarnissaata
naammagittaalliutigineqarsinnaanerani pillugu ammaassisoqassasoq
instituttip tusarniummut akissummini ilaatigut innersuussutigimmagu instituttip
uani maluginiaqquaa.

Kalaallit Nunaanni eqqartuussisarnermik inatsisip aamma Kalaallit Nunaanni Pinerluttulerinermi inatsisip allanngortinneqarneri pillugit inatsit nr. 1718, 27. december 2018-imeersoq (Immikkut paarineqartussanngortitanik inissiinerit il.il.) aqutigalugu Kalaallit Nunaanni immikkut paarineqartussanngortillugit eqqartuunneqarsimasut inissiisarfimmi ammasumi inissinneqarsimasut Nuummi immikkoortortami immikkut paarisassanngortitsiffiusumut nuutsinneqarsinnaanerani, taavalu immikkoortortaarfimmiit tassanga Kalaallit Nunaanni inissiisarfimmut ammasumut nuunneqarsinnaanerani pillugu ilaatigut inatsisitigut tunngavissamik pilersitsisoqarpoq. Immikkut paarineqartussanngortillugu eqqartuunneqartup immikkoortortaarfimmiit ammasumiit immikkoortortaarfimmut immikkut paarinniffiusussamut utertinneqarnera pillugu aalajangiinermut naammagittaallioqarsinnaanera inatsimmi pilersinneqanngilaq. Kalaallit Nunaanni Pinerluttunik Isumaginnittoqarfiup aqutsisuunit aalajangikkat allaffissornikkut oqartussaasunut allanut saqqummiunneqarsinnaannginnerat pillugit Pinerluttulerinermut inatsisimmi § 245, imm. 3-mi aallaaviusumik allanngortitsinissaq Justitsministeriaqarfiup pissutissaqartinngikkaa inatsisissatut siunnersuutip tusarniaassutigineqarneranut oqaaseqaatini atuarneqarsinnaavoq. Tassunga atatillugu pinerluttulerinermi inatsisip pilersinneqarnera sioqqullugu Kalaallit Nunaanni Eqqartuussiveqarneq pillugu ataatsimiititaliarsuup Kalaallit Nunaanni Pinerluttunik Isumaginnittoqarfiup aqutsisuunit aalajangikkat Pinerluttunik Isumaginnittoqarfiup Pisortaqarfianut saqqummiunneqartarsinnaannginnerat eqqarsaatersuutigisimavaa. Ilaatigut suliat aalajangersimasut pillugit naammagittaalliuuteqarnerit qallunaat oqartussaasuunit Kalaallit Nunaanni pissutsinik ilisimasaqanngitsunit inaarutaasumik aalajangiivigineqarsinnaaqunagit, Kalaallit Nunaanni Pinerluttunik Isumaginnittoqarfiup aqutsisuunit aalajangerneqartut inaarutaasumik aalajangiinerussasut ataatsimiititaliarsuup aalajangiuppaa (ataatsimiititaliarsuup isumaliutissiissutaa nr. 1442/2004 Kalaallit Nunaanni Eqqartuussiveqarnermut tunngasoq, atuagaq 3, qupp. 1123-1125).

Immikkut paarineqartussatut eqqartuunneqartut immikkoortumi ammasumi inissinneqarnissaat naleqqutinngippat, imaluunniit inissiineq taanna naammattumik isumannaassuseqanngitsoq takuneqarsinnaappat, inuit sungiuussiartuaartinneqarnissaminnut atatillugu Kalaallit Nunaanni inissiisarfimmi inissiisarfimmi ammasumi inissinneqarsimasut, Nuummi

immikkoortortami immikkut paarissassannortitsiffiusumi nuunneqarsinnaanerata, inatsisissatut siunnersuut manna aqquutigalugu inatsisitigut tunngavilerneqassasoq siunnersuutigineqarpoq. Inatsisissatut siunnersuummut oqaaseqaatini nalinginnaasuni imm. 5.1-imi soorlu takuneqarsinnaasoq, inatsisip nr. 1718-ip, 27. december 2018-imeersup piffissami inatsisip atuutilerfiani ullormi 1. august 2019-imi, sungiussiartuaartinneqarnissaminnut atatillugu immikkut paarineqartussatut eqqartuunneqartunik Kalaallit Nunaanni inissiisarfimmi immikkoortumi ammasumi inissinneqarsimasut Nuummi inissiisarfimmi immikkut paarinniffiusussamut nuunneqarneranni inatsisitigut tunngaviusussanik pilersitsisoqarsinnaanerata ilimagineqarsinnaannginnera tamatumunnga tunuliaqutaavoq.

Immikkut paarineqartussatut eqqartuunneqartunut taakkununnga tunngatillugu, pinerluttulerinermi inatsimmi aallaaviusumik, tassalu Kalaallit Nunaanni Pinerluttunik Isumaginnittoqarfiup aqutsisuisa aalajangigaannik allaffissornikkut oqartussaasunut allamut saqqummiussisoqarsinnaannginneranut tunngasumik allanngortitsinissaq Justitsministeeriaqarfiup aammattaaq pissutissaqarsorinnigilaa. Taamaalilluni inatsimmut nr. 1718-imut, 27. december 2018-imeersumut inatsisissatut siunnersuutip tusarniaassutigineranut oqaaseqaatit allattorsimaffianni pissutsit taamaattut takuneqarsinnaasut pingaartinneqarput.

3. Inatsisissatut siunnersuut

Inatsisissatut siunnersuummut missingiummut tusarniaassutigineqartumut tunngatillugu, inatsisissatut siunnersuutitut saqqummiunneqartumut – qulaani imm. 2-mi allannguutissatut taaneqartut saniatigut – uku allanngortinneqarput:

3.1 Inatsisissatut missingiummi § 64, imm. 4, maanna ima allanngortinneqarpoq, Kalaallit Nunaanni Politiit Naammagittaalliuutigineqartarnerannut Siunnersuisoqatigiinni inuinnaat marluk Naalakkersuisunit toqqarneqartussat toqqarneqartarnerannut taarsiullugu, Inatsisartunit toqqarneqartarnissaat allassimalerluni. Taamaalilluni maannakkut aqqissuussineq ingerlateqqinneqassaaq, tamatumalu kingorna Kalaallit Nunaanni politiini sulisuusut pillugit naammagittaalliuutinik aamma taakku pillugit pinerluttulerinermik suliaassanik suliarinnittarneq pillugu inatsit nr. 905, 16. december 1998-imeersoq naapertorlugu Inatsisartut tassaalissapput Politiit pillugit naammagittaalliuuteqartarfimmi ilaasortassanik inuinnarnik toqqaasartussat.

3.2 Inatsisissatut missingiummi § 492 r aamma § 493 m ima allanngortinneqarput, taamaalilluni illersuineramik suliallit sulitillutik eqqartuussisarnermi inatsimmi § 62, imm. 3 malillugu politiitut sulinerminni Politiit pillugit Naammagittaalliuuteqartarfik Arlaannaannulluunniit Attuumassuteqanngitsup piginnaatitaaneranut aamma ilanngunneqartut allassimalerluni. Tamanna ilaatigut qimussimik Issittumi alapernaarsuisunut Siriusikkunntut Kalaallit Nunaata Avannaarsuani Tunumilu Nunamik eqqissisimatitamik politiitut oqartussaassuseqarnerannut atuuppoq. Tamatuma peqatigisaanik inatsisissamat missingiummi § 493 m, imm. 2-mi, sakkutuunik eqqartuussisarnermik inatsit imm. 1-mi ilaasunut atorneqassanngitsoq, erseqqissaatigineqarpoq. Aalajangersakkap siunnersuutigineqartup sakkutuut illersuineramik suliaqartut pillugit pinerluttulerineramik suliat misissornissaannut piginnaatitaaneq sakkutuunut unnerluussaataitasunit Politiit pillugit naammagittaalliuuteqartarfimmut nuunneqarnissaat taamaalilluni tamatuma kinguneraa. Unnerluussisinnaanermik piginnaatitaaneq saqitsaanermik sulianik unnerluussisussaataitasunut nuunneqassaaq – aallaaviatigut statsadvokatimut.

3.3. Inatsisissatut missingiummi § 493 l ima allanngortinneqarpoq imm. 2-tut aalajangersagaq nutaaq ilanngunneqarluni, tassani suliani imm. 1-imi allassimasuni eqqartuussissuserisussanngortitsinermit aningaasartuutit naalagaaffiup karsianit akilerneqartassasut ilanngunneqarluni. Eqqartuussisarnermik inatsimmi kapitali 42 malillugu aalajangiivigineqartussatut taarsiivigineqarnissamik suliaqartoqassasoq inummit toqqarneqarpat, tassani pinerluuteqartoqarsimanerup kinguneranik malitseqartitsinissami taarsiivigineqarnissamik suliap suliarineqarnissaani qanoq ingerlanneqarnissaa aalajangerneqarluni, taava pisuni tamani eqqartuussissuserisussanngortitsinermit aningaasartuutit naalagaaffiup karsianit akilerneqartarnissaat imm. 2-kkut erseqqilluinnartumik aalajangersarneqarpoq. Taamaalilluni siunnersuummi § 493 l qallunaat eqqartuussisarnermik inatsisaannut § 1020 l-imut assigiissinneqarput.

3.4. Allanneqarsimasut oqaasertaanik allanngortitsinerit pineqarneranni inatsisissatut missingiummi tamarmi »rigsadvokatit« allassimasut »Rigsadvokat«-inngortinneqarput, Rigsadvokat-ip pisorta qarfitut taaguutaata naqinnera siulleq angisuumik allassimasusnaanera tassunga pissutaavoq. Tamatuma saniatigut inatsisissatut missingiummi § 7 immikkut paarineqartussatut eqqartuunneqartunut sungiussiartuaartinneqarnissaminnut atatillugu nuutsitsinermit tunngasoq inatsisissatut missingiummi pinerluttulerinerimi inatsimmi § 2-mut nuunneqarpoq. Tamatuma saniatigut inatsisissatut missingiummi § 62 g, litra c, § 63, imm. 1-imut

innersuussisoqarpoq.

Inatsimmi allassimasut imaannik allangortitsinerit saniatigut, aalajangersakkat ilaat erseqqissarneqarput nutarterneqarlutilluunniit, kukkunerillu aaqqinneqartariaqartut iluarsineqarlutik. Tamatuma saniatigut inatsisissatut siunnersuummut oqaaseqaatit arlallit iluarsineqarput, nutarterneqarlutik aamma allassisut imaat allangortinneqarlutik.

3.5 Inatsisissatut siunnersuummi saqqummiunneqartumi – Kalaallit Nunaanni Namminersorlutik Oqartussat aamma Politiit Peqatigiiffiata kissaateqarnerat malillugu – politimesterip inatsisilerinermik kandidatit ilinniarsimanissaanik piunnaarsinneeqarnissaa inassutigineqarpoq.